

清

史

稿

清史稿

列傳八十二

隆科多

年羹堯 滿洲人

隆科多佟佳氏滿洲鑲黃旗人一等公佟國維子孝懿仁皇后弟也康熙二十七年授一等侍衛擢鑾儀使兼正藍旗蒙古副都統四十四年以所屬人違法上責隆科多不實心任事罷副都統鑾儀使在一等侍衛上行走五十年授步軍統領五十九年擢理藩院尙書仍管步軍統領六十一年十一月聖祖大漸召受顧命世宗即位命與大學士馬齊總理事務襲一等公授吏部尙書旋以總理事務勞加一等阿達哈哈番以其長子岳興阿襲次子玉柱自侍衛授鑾儀使雍正元年與川陝總督年羹堯同加太保二年兼領理藩院事纂修聖祖實錄大清會典並充總裁監修明史復與羹堯同賜雙眼花翎四團龍補服黃帶紫轡三年解步軍統領玉柱以行止甚劣奪官交隆科多管束羹堯得罪上以都統范時捷疏劾欺罔貪婪諸狀及妄劾道員金南鐸等並下吏部議處上諭曰前以隆科多年羹堯頗著勤勞予以異數乃交結專擅諸事欺隱命繳上

所賜四團龍補服並不得復用雙眼花翎黃帶紫轡及議上以時捷劾請罷羹堯任以妄劾南鐸請嚴加治罪上以前議徇庇後議復過當責隆科多有意擾亂削太保及一等阿達哈哈番世職命往阿蘭善等處修城墾地諭曰朕御極之初隆科多年羹堯皆寄以心腹毫無猜防孰知朕視爲一德彼竟有二心招權納賄擅作威福欺罔悖負朕豈能姑息養奸耶向日明珠索額圖結黨行私聖祖解其要職置之閒散何嘗更加信用隆科多年羹堯若不知恐懼痛改前非欲如明珠等萬不能也殊典不可再邀覆轍不可屢蹈各宜警懼毋自干誅滅四年隆科多家僕牛倫挾勢索賄事發逮下法司鞫得隆科多受羹堯及總督趙世顯滿保巡撫甘國璧蘇克濟賄獻上上命斬倫罷隆科多尙書令料理阿爾泰等路邊疆事務尋命勘議俄羅斯邊界初隆科多與阿靈阿揆敘相黨附既又與羹堯交結至是上盡發阿靈阿揆敘及羹堯罪狀宣示中外又侍郎查嗣庭爲隆科多所薦坐悖逆誅死上詰隆科多隆科多不以實對五年宗人府復奏劾輔國公阿布蘭以玉牒畀隆科多藏於家阿布蘭坐奪爵幽禁上命

奪隆科多爵召還京命王大臣會鞠以聖祖升遐隆科多未在上前妄言身藏匕首以防測又自擬諸葛亮奏稱白帝城受命之日即死期將至之時上躬祀壇廟妄謂防刺客令於案下搜查上謁陵妄奏諸王心變具獄辭大不敬之罪五欺罔之罪四紊亂朝政之罪三黨姦之罪六不法之罪七貪婪之罪十六凡四十一款當斬妻子入辛者庫財產入官上諭曰隆科多罪不容誅但皇考升遐大臣承旨者惟隆科多一人今以罪誅朕心有所不忍可免其正法於暢春園外築屋三楹永遠禁錮妻子免入辛者庫岳興阿奪官玉柱發黑龍江六年六月科布多死於禁所賜金治喪

年獎堯字亮工漢軍鑲黃旗人父遐齡自筆帖式授兵部主事再遷刑部郎中康熙二十二年授河南道御史四遷工部侍郎出爲湖廣巡撫湖北武昌等七府歲徵匠役班價銀千餘戶絕額缺爲官民累遐齡請歸地丁徵收下部議從之疏劾黃梅知縣李錦虧賦奪官錦清廉得民民爭完通賦諸生吳士光等聚衆閉城留錦事聞上命調錦直隸士光等發奉天遐齡與總督郭琇俱降級留

任四十三年遐齡以病乞休夔堯康熙三十九年進士改庶吉士授檢討迭充四川廣東鄉試考官累遷內閣學士四十八年擢四川巡撫四十九年幹偉生番羅都等掠寧番衛戕游擊周玉麟上命夔堯與提督岳昇龍勦撫昇龍率兵討之擒羅都夔堯至平番衛聞羅都已擒引還川陝總督晉泰疏劾部議當奪官上命留任五十六年越窩衛屬番與普雄土千戶那交等爲亂夔堯遣游擊張玉勦平之是歲策妄阿喇布坦遣其將策凌敦多布襲西藏戕拉藏汗四川提督康泰率兵出黃勝關兵譁引還夔堯遣參將楊盡信撫諭之密奏泰失兵心不可用請親赴松潘協理軍務上嘉其實心任事遣都統法喇率兵赴四川助勦五十七年夔堯令護軍統領溫普進駐裏塘增設打箭爐至裏塘驛站尋請增設四川駐防兵皆允之上嘉夔堯治事明敏巡撫無督兵責特授四川總督兼管巡撫事五十八年夔堯以敵情叵測請赴藏爲備廷議以松潘諸路軍事重要令夔堯毋率兵出邊檄法喇進師法喇率副將岳鍾琪撫定裏塘巴塘夔堯亦遣知府遲維德招降乍丫察木多察哇諸番目因請召法喇師還從之

五十九年上命平逆將軍延信率兵自青海入西藏授羹堯平西將軍印自拉里會師並諮羹堯孰可署總督者羹堯言一時不得其人請以將軍印畀護軍統領噶爾弼而移法喇軍駐打箭爐上用其議巴塘裏塘本雲南麗江土府屬地既撫定雲貴總督蔣陳錫請仍隸麗江土知府木興羹堯言二地爲入藏運糧要路宜屬四川從之興率兵往收地至喇皮擊殺番酋巴桑羹堯疏劾上命逮興囚雲南省城八月噶爾弼延信兩軍先後入西藏策凌敦多卜敗走西藏平上諭羹堯護凱旋諸軍入邊召法喇還京師羹堯尋遣兵撫定裏塘屬上下牙色上下雅尼巴塘屬桑阿壩林卡石諸生番六十年入覲命兼理四川陝西總督辭還鎮賜弓矢上命噶爾弼率兵駐守西藏行次瀘定橋噶爾弼病不能行羹堯以聞上命公策旺諾爾布署將軍額駙阿寶都統武格參贊軍務駐西藏青海索羅木之西有郭羅克上中下三部爲唐古特種人屢出肆掠阿寶以聞上令羹堯與鍾琪度形勢策進討羹堯疏言郭羅克有隘口三悉險峻宜步不宜騎若多調兵塞上傳聞使賊得爲備不如以番攻番臣素知瓦斯雜谷諸

土司亦憾郭羅克肆惡願出兵助勦臣已移鍾琪令速赴松潘出塞督土兵進
勦尋鍾琪督兵擊敗郭羅克下番寨四十餘獲其渠餘衆悉降六十一年熈堯
密疏言西藏喇嘛楚爾齊木臧布及知府石如金呈策旺諾爾布委糜副都統
常齡侍讀學士滿都員外郎巴特瑪等任意生事致在藏官兵不睦因請撤駐
藏官兵下廷臣議以熈堯擅議撤兵請下部嚴議上原之命召滿都巴特瑪石
如金楚爾齊木臧布等來京師遣四川巡撫色爾圖陝西布政使塔琳赴西藏
佐策旺諾爾布駐守自軍興陝西州縣饋餉供億庫帑多虧缺熈堯累疏論劾
州縣吏嚴督追償陝西巡撫噶什圖密奏虧項不能速完又與熈堯請加徵火
耗墊補上諭曰各省錢糧皆有虧空陝西尤甚蓋自用兵以來師所經行資助
馬匹盤費衣服食物倉卒無可措辦勢必挪用庫帑及撤兵時亦然即如自藏
回京將軍以至士卒途中所得反多於正項各官費用動至萬金但知取用不
問其出自何項也熈堯等欲追虧項以充兵餉追比不得又議加徵火耗火耗
止可議減豈可加增朕在位六十一年從未加徵火耗今若聽其加派必致與

正項一例催徵肆無忌憚矣著傳旨申飭命發帑銀五十萬送陝西資餉世宗
即位召撫遠大將軍允禔還京師命奠堯管理大將軍印務雍正元年授奠堯
二等阿達哈哈番世職並加還齡尙書銜尋又加奠堯太保詔撤西藏駐防官
軍奠堯疏陳邊防諸事請於打箭爐邊外中渡河口築土城移嵐州守備駐守
大河南保縣移威茂營千總駐守越嶲衛地方審閱蠻獠出沒改設游擊增兵
駐守松潘邊外諸番阿樹爲最要給長官司職銜大金川土目莎羅奔從征羊
崗有功給安撫司職銜烏蒙蠻目達木等凶暴土舍祿鼎坤等請禽獻俟其至
給土職分轄其地下部議從之論平西藏功以奠堯運糧守隘封三等公世襲
青海台吉羅卜藏丹津爲顧實汗孫糾諸台吉吹拉克諾木齊阿爾布坦溫布
藏巴札布等刼親王察罕丹津叛掠青海諸部上命奠堯進討諭撫遠大將軍
延信及防邊理饒諸大臣四川陝西雲南督撫提鎮軍事皆告奠堯十月奠堯
率師自甘州至西寧改延信平逆將軍解撫遠大將軍印授奠堯盡護諸軍奠
堯請以前鋒統領素丹提督岳鍾琪爲參贊大臣從之論平郭羅克功進公爵

二等獎堯初至西甯師未集羅卜藏丹津調知之乃入寇悉破傍城諸堡移兵向城獎堯率左右數十人坐城樓不動羅卜藏丹津稍引退圍南堡獎堯令兵斫賊壘敵知兵少不爲備驅桌子山土番當前隊礮發土番死者無算鍾琪兵至直攻敵營羅卜藏丹津敗奔師從之大潰僅率百人遁走獎堯乃部署諸軍令總兵官周瑛率兵截敵走西藏路都統穆森駐吐魯番副將軍阿喇納出噶斯暫駐布隆吉爾又遣參將孫繼宗將二千人與阿喇納師會敵侵鎮海堡都統武格赴援敵圍堡戰六晝夜參將宋可進等赴援敵敗走斬六百餘級獲多巴囊素阿旺丹津羅卜藏丹津攻西甯南川口師保中中堡敵圍堡堡內囊素與敵通欲鑿牆而入守備馬有仁等力禦可進等赴援夾擊敵敗走諸囊素助敵者皆殺之獎堯先後疏聞並請副都統花色等將鄂爾多斯兵副都統查克丹等將歸化土默特兵總兵馬觀伯將大同鎮兵會甘州助戰從之西甯北川上下北塔蒙回諸衆將起應羅卜藏丹津獎堯遣千總馬忠孝撫定下北塔三十餘莊上北塔未服忠孝率兵往勦擒戮其渠餘衆悉降察罕丹津走河州羅

卜藏丹津欲刦以去。夔堯令移察罕丹津及其族屬入居蘭州。青海台吉索諾木達什爲羅卜藏丹津誘擒。脫出來歸。夔堯奏聞。命封貝子。令夔堯撫慰敵掠。新城堡。夔堯令西甯總兵黃喜林等往勦。斬千五百餘級。擒其渠七。得器械。駝馬牛羊無算。以天寒。夔堯令引師還西甯。尋策來歲進兵。疏請選陝西督標西安固原甯夏四川大同榆林綠旗兵及蒙古兵萬九千人。令鍾琪等分將出西甯松潘甘州布隆吉爾四道進討。分兵留守西甯甘州布隆吉爾並駐防永昌巴塘裏塘黃勝關。察木多諸隘。軍中馬不足。請發太僕寺上都打布係腦兒孳生馬三千。巴爾庫爾駝一千。仍於甘涼增買千五百糧米。臣已在西安豫買六萬石。軍中重火器請發景山所製火藥一百駝駝以一百八十斤計。下廷議。悉如所請。馬加發千。火藥加發倍。所請察罕丹津屬部殺羅卜藏丹津守者來歸。夔堯宣上指安置四川邊外。墨爾根戴青拉查卜與羅卜藏丹津合力劫察罕丹津其子察罕喇卜坦等來歸。夔堯令招拉查卜內附。又有堪布諾門汗察罕丹津從子也爲塔兒寺喇嘛叛從敵。糾衆拒戰。至是亦來歸。夔堯數其罪。斬之。

羅卜藏丹津侵布隆吉爾繼宗與副將潘之善擊敗之西甯南川塞外郭密九部屢出爲盜羹堯招三部內附餘部行掠如故呈庫沃爾賈二部尤暴戾羹堯令鍾琪率瓦斯雜谷二土司兵至歸德堡撫定上下寺東策布督兵進殲呈庫部衆擒戮沃爾賈部酋餘並乞降二年上以羅卜藏丹津負國叛不可宥授鍾琪奮威將軍趣羹堯進兵西甯東北郭隆寺喇嘛應羅卜藏丹津爲亂羹堯令鍾琪及素丹等督兵討之賊屯哈拉直溝以拒師奮入度嶺三毀寨十可進喜林及總兵吳正安皆有斬馘復毀寨七焚所居室至寺外賊伏山谷間聚薪縱火賊殲焉殺賊六千餘燬寺誅其渠青海貝勒羅卜藏察罕貝子濟克濟札布台吉滾布色卜騰納漢將毋妻詣羹堯請內屬羹堯予以茶葉大麥令分居邊上羹堯遣鍾琪正安喜林可進及侍衛達鼐副將王嵩紀成斌將六千人深入留素丹西甯佐治事二月鍾琪師進次伊克喀爾吉搜山獲阿爾布坦溫布喜林亦得其曾巴珠爾阿喇布坦等師復進羹堯調知阿岡都番助敵別遣涼莊道蔣洞等督兵攻之戮其囊蘇復擊破石門寺喇嘛殺六百餘人焚其寺鍾琪

師復進次席爾哈羅色遣兵攻噶斯遂吹拉克諾木齊三月鍾琪師復進出布哈屯羅卜藏丹津所居地曰額納布隆吉鍾琪督兵直入分兵北防柴旦木斷往噶斯道羅卜藏丹津走烏蘭穆和兒復走柴旦木師從之獲其母阿爾太哈屯及其戚屬等並男婦牛羊駝馬無算分兵攻烏蘭白克獲吹拉克諾木齊及助亂八台吉時藏巴札布已先就擒羅卜藏丹津以二百餘人遁走青海部落悉平論功進襲堯爵一等別授精奇尼哈番令其子斌襲封遐齡如襲堯爵加太傅並授素丹可進三等阿達哈哈番喜林二等阿達哈哈番按察使王景灝及達鼎瑛嵩成斌拜他喇布勒哈番提督郝玉麟及正安拖沙喇哈番阿拉布坦蘇巴泰等截路行劫襲堯令繼宗往剿遂至推墨爾阿拉布坦蘇巴泰將妻子遁走成斌等搜戮餘賊至梭羅木擊斬堪布夾木燄垂扎木素襲堯遣達鼎及成斌攻布哈色布蘇獲台吉阿布濟車陳又遣副將岳起龍討平河州塞外鐵布等八十八寨殺二千一百餘人得人口牲畜無算襲堯執吹拉克諾木齊阿爾布拉溫布藏巴扎布檻送京師上祭告廟社景陵御午門受俘襲堯策防

邊諸事以策旺阿喇布坦遣使乞降請能北征師分駐巴里坤吐魯番哈密城
布隆吉爾駐兵守焉耆以總兵每營撥餘丁屯赤金衛柳溝所墾田設同知理
民事衛守備理屯糧游牧蒙古令分居布隆吉爾迤南山中寧夏邊外阿拉善
以滿洲兵駐防上悉從所請莊浪邊外謝爾蘇部土番據桌子碁子二山爲巢
皆穴地而居官軍駐其地奴使之兵或縱掠番禦之盡殲置不問番始橫涼州
南崇寺沙馬拉木扎木巴等掠新城張義諸堡又有郭隆寺逸出喇嘛與西寧
納朱公寺朝天堂加爾多寺諸番相結糾謝爾蘇部土番謀爲亂斃堯遣鍾琪
等督兵討之納朱公寺喇嘛降師進次朝天堂遣成斌喜林及副將張玉等四
道攻加爾多寺殺數百人餘衆多入水死焚其寺游擊馬忠孝王大勳戰和石
溝王序吉范世雄戰石門口洞戰喜達堡蘇丹師次旁伯拉夏口土番僞降謂
之方置伏縱兵擊之所殺傷甚衆洞搜勦碁子山逐賊巴洞溝土司魯華齡逐
賊天王溝先密寺喇嘛縛其渠阿旺策凌以獻師入轉戰五十餘日殺土番殆
盡斃堯以先密寺喇嘛反覆不常併焚其寺徙其衆加爾多寺外桌子山餘衆

降奠堯令隸華齡受約束條上青海善後諸事請以青海諸部編置佐領三年一入貢開市那拉薩拉陝西雲南四川三省邊外諸番增設衛所撫治諸廟不得過二百楹喇嘛不得過三百西甯北川邊外築邊牆建城堡大通河設總兵鹽池保安堡及打箭爐外木雅吉達巴塘裏塘諸路皆設兵發直隸山西河南山東陝西五省軍罪當遣者往大通河布隆吉爾屯田而令鍾琪將四千人駐西甯撫綏諸番下王大臣議行十月奠堯入覲賜雙眼花翎四團龍補服黃帶紫轡金幣敘功加一等阿思哈哈番世職令其子富襲奠堯才氣凌厲恃上眷遇師出屢有功驕縱行文諸督撫書官斥姓名請發侍衛從軍使爲前後導引執鞭墜鎗入覲令總督李維鈞巡撫范時捷跪道送迎至京師行絕馳道王大臣郊迎不爲禮在邊蒙古諸王公見必跪額駙阿寶入謁亦如之嘗薦西安布政使胡期恒及景灝可大用勅四川巡撫蔡珽逮治上即以授景灝又擢期恒甘肅巡撫奠堯僕桑成鼎魏之耀皆以從軍屢擢成鼎布政使之耀副將奠堯請發將吏數十從軍上許之覲還即勅罷驛道金南鐔等而請以從軍主事丁

松署糧道上責龔堯題奏錯誤命期恆率所劾官吏詣京師三年正月珽逮至上召入見備言龔堯暴食誣陷狀上特宥珽罪二月庚午日月合璧五星聯珠龔堯疏賀川夕惕朝乾語上怒責龔堯有意倒置諭曰龔堯不以朝乾夕惕許朕則龔堯青海之功亦在朕許不許之間而未定也會期恆至入見上以奏對悖謬奪官上命更定打箭爐外增汰官兵諸事不用龔堯議四月上諭曰龔堯舉劾失當遣將士築城南坪不惜番民致驚惶生事反以降番復叛具奏青海蒙古饑饉臣不上聞怠玩昏憤不可復任總督改授杭州將軍而以鍾琪署總督命上撫遠大將軍印龔堯既受代疏言臣不敢久居陝西亦不敢遽赴浙江今於儀徵水陸交通之處候旨上益怒促龔堯赴任山西巡撫伊都立都統前山西巡撫范時捷川陝總督岳鍾琪河南巡撫田文鏡侍郎黃炳鴻臚少卿單疇書原任直隸巡撫趙之垣交章發劾堯罪狀侍郎史貽直高其佩赴山西按時捷劾龔堯遣兵圍邵陽民堡殺戮無辜亦以謝辭入奏上命分案議罪罷龔堯將軍授閒散章京自二等公遞降至拜他喇布勒哈番乃盡削龔堯職十二

月逮至京師下議政大臣三法司九卿會鞠是月甲戌具獄辭夔堯大逆之罪五欺罔之罪九僭越之罪十六狂悖之罪十三專擅之罪六忌刻之罪六殘忍之罪四貪黷之罪十八侵蝕之罪十五凡九十二款當大辟親屬緣坐上諭曰夔堯謀逆雖實而事蹟未著朕念青海之功不忍加極刑遣領侍衛內大臣馬爾賽步軍統領阿齊圖齎詔諭夔堯獄中令自裁遐齡及夔堯兄希堯奪官免其罪斬其子富諸子年十五以上皆戍極邊夔堯幕客鄒魯汪景祺先後皆坐斬親屬給披甲爲奴又有靜一道人者四川巡撫憲德補送京師亦誅死五年赦夔堯諸子交遐齡管束遐齡旋卒還原職賜祭希堯初自筆帖式累擢工部侍郎既奪官復起內務府總管命權稅淮安加左都御史十三年爲江蘇巡撫高其倬劾罷乾隆三年卒胡期恒字元方湖廣武陵人祖統虞明崇禎末進士國初授檢討官至秘書院學士父獻徵自蔭生授都察院經歷官至湖北布政使期恒康熙四十四年舉人獻徵與遐齡友歎若弟昆期恒少從夔堯游上南巡獻詩授翰林院典籍出爲夔州通判有恩信民爲建生祠夔堯爲巡撫薦期

恒遷夔州知府再遷川東道夔堯兼督陝西復薦遷西安布政使期恒通曉朝章國故才敏善理繁劇夔堯深倚之夔堯挾貴而驕惟期恒能以微言救其失夔堯奴辱咸陽知縣期恒執而杖之自是諸奴稍斂戢嘗諷夔堯善持盈夔堯勿能用及夔堯敗諸爲夔堯引進者爭劾夔堯以自解期恒惟引咎終不言夔堯乃下獄頌繫至高宗即位始得釋僑居江南久之卒

論曰雍正初隆科多以貴戚年夔堯以戰多內外夾輔爲重臣乃不旋踵幽囚誅夷亡也忽諸當其貴盛侈汰隆科多恃元舅之親受顧命之重夔堯自代允禩爲大將軍師所向有功方且憑藉權勢無復顧忌即於覆滅而不自恤臣罔作威福古聖所誠可不謹歟

清史稿

列傳八十三

岳鍾琪

字東美
號子鶴

鍾琪子鶴

策校

子成
黃札布

布登札布

岳鍾琪字東美四川成都人父昇龍初入伍授永泰營千總康熙十二年吳三桂反永泰營游擊許忠臣受三桂劄昇龍使詣提督張勇告變密結兵民執忠臣殺之十四年從西甯總兵王進寶克蘭州先登被創遷莊浪守備從克臨洮平關隴加都督僉事銜累擢天津總兵三十五上年親征噶爾丹昇龍將三百騎護糧上命昇龍及馬進良白斌副將以次有違令退怯者得斬之乃聞昭莫多之捷授拖沙喇哈番擢四川提督初西藏營官入駐打箭爐上使勘界四川巡撫于養志言營官司貿易不與地方事居數年營官喋吧昌側集烈發兵據瀘河東諸堡昇龍以五百人防化林營養志反劾昇龍擅發兵昇龍亦訐養志上使勘諭養志坐斬昇龍亦奪官喋吧昌側集烈擊殺明正土司蛇蜡喀吧傷官兵提督唐希順討之上命昇龍從軍事定希順以病解任仍授昇龍提督四

十九年乞休昇龍本貫甘肅臨洮以母年逾九十乞入籍四川許之逾二年卒
雍正四年追諡敏肅鍾琪初入資爲同知從軍請改武職上命以游擊發四川
旋授松潘鎮中軍游擊再遷四川永甯協副將五十八年準噶爾策妄阿喇布
坦遣其將策凌敦多布襲西藏都統法喇督兵出打箭爐撫定裏塘巴塘檄鍾
琪前驅至裏塘第巴不受命誅之巴塘第巴懼獻戶籍乍丫察木多察哇諸番
目皆順命五十九年定西將軍噶爾弼師自拉里入仍令鍾琪前驅鍾琪次察
木多選軍中通西藏語者三十人更衣間行至洛隆宗斬準噶爾使人番衆驚
請降噶爾弼至軍用鍾琪策招西藏公布以二千人出降鍾琪遂督兵渡江直
薄拉薩大破西藏兵禽喇嘛爲內應者四百餘人策凌敦多布敗走西藏平六
十年師還授左都督擢四川提督賜孔雀翎命討郭羅克番部鍾琪率師並督
瓦斯維谷諸土司兵自松潘出邊郭羅克番兵千餘出拒鍾琪擊破之取下郭
羅克吉宜卡等二十一寨殲其衆乘夜督兵進至中郭羅克納務寨番兵出拒
鍾琪奮擊未終日連克十九寨斬三百餘級獲其渠酋他爾喀索布六戈復督

兵進攻上郭羅克押六寨番目且增縛首惡假磔等二十二人以降郭羅克三部悉定予拜他喇布勒哈番世職六十一年討平羊峒番於其地設南坪營雍正元年師討青海撫遠大將軍年羹堯請以鍾琪參贊軍事鍾琪將六千人出歸德堡撫定上寺東策卜下寺東策卜諸番部南川塞外郭密九部屢盜邊而呈庫活爾賈二部尤橫鍾琪移師深入搗其巢盡平之二年授奮威將軍趣進兵郭隆寺喇嘛應羅卜藏丹津爲亂鍾琪會諸軍合擊殲其衆燬寺擒戮其渠達克瑪胡土克圖羅卜藏丹津居額穆納布隆吉爾其大酋阿爾布坦溫布吹拉克諾木齊分屯諸隘鍾琪與諸將分道入鍾琪及侍衛達鼎出南路總兵吳正安出北路黃喜林宋可進出中路副將王嵩紀成斌搜山師進至哈喇烏蘇方黎明番衆未起即縱擊斬千餘人番衆驚走逐之一晝夜至伊克喀爾吉獲阿爾布坦溫布復進次席爾哈羅色遣兵攻噶斯復進次布爾哈屯薄額穆納布隆吉爾羅卜藏丹津西竄鍾琪逐之一晝夜馳三百里其酋彭錯等來降鍾琪令守備劉廷言監以前驅鍾琪繼其後其酋吹因來降言羅卜藏丹津所在

距師百五六十里鍾琪令暫休薄暮復進黎明至其地羅卜藏丹津之衆方散就水草即縱擊大破之禽諸台吉並羅卜藏丹津母阿爾泰哈屯及女弟阿寶羅卜藏丹津易婦人服以遁廷言等亦得吹拉克諾木齊等鍾琪復進至桑陀海不見虜乃還出師十五日斬八萬餘級大酋助羅卜藏丹津爲亂者皆就擒青海平上授鍾琪三等公賜黃帶莊浪邊外謝爾蘇部土番據棹子基子二山爲亂納朱公寺朝天堂加爾多寺諸番與相糾合夔堯遣鍾琪等督兵分十一路進剿凡五十餘日悉討平之命兼甘肅提督三年復命兼甘肅巡撫四月解夔堯兵柄改授杭州將軍命鍾琪亦上舊威將軍印署川陝總督盡護諸軍河州松潘舊爲青海蒙古互市地夔堯奏移於那喇薩喇鍾琪奏言青海部長察罕丹津等部落居黃河東請仍於河州松潘互市額爾德尼額爾克托克托爾等部落居黃河西請移市西塞塞外丹噶爾寺蒙古生業全資牲畜請六月後不時交易四川雜谷金川沃日諸土司爭界夔堯令金川割美同等寨界沃日致警殺不已鍾琪奏請還金川而以龍堡三歇地予沃日上皆許之尋眞除川

陝總督疏言土司承襲文武吏往往索費封其印數年不與致番日專恣讐殺請定限半年仍令應襲者先行署理土司有外支循謹能治事者許土官詳督撫給職銜分轄其地多三之一少五之一使勢相維情相安入覲加兵部尙書銜疏言察木多外魯隆宗察哇坐爾剛桑噶吹宗袁卓諸部距打箭爐遠不便遙制請宣諭達賴喇嘛令轄其地中甸裏塘巴塘及得爾格特瓦舒霍耳諸地並歸內地土司又言巴塘隸四川中甸隸雲南而巴塘所屬木咱爾祁宗拉普維西諸地逼近中甸總會於阿墩子實中甸門戶請改隸雲南與四川裏塘打箭爐互爲犄角下王大臣議如所請四年春請選西安滿洲兵千人駐潼關冬請以陝甘兩省丁銀攤入地畝征收自雍正五年始著爲定例逾年復疏言甘屬河東糧輕丁多河西糧多丁少請將二屬各自均派河東丁隨糧辦河西糧照丁攤下部議行四川烏蒙土知府祿萬鍾擾雲南東川鎮雄土知府隴慶侯及建昌屬冕山涼山諸苗助爲亂上命鍾琪與雲貴總督鄂爾泰會師討之五年春擒萬鍾慶侯亦降烏蒙鎮雄皆改土歸流冕山涼山亦以次底定鍾琪督

三省天下勁兵處疑忌衆成都訛言鍾琪將反鍾琪疏聞上諭曰數年以來說鍾琪者不止謗書一篋甚且謂鍾琪爲岳飛裔欲報宋金之仇鍾琪懃著助勞朕故任以要地付之重兵川陝軍民受聖祖六十餘年厚澤尊君親上衆共聞知今此造言之人不但謗大臣並誣川陝軍民以大逆命巡撫黃炳提督黃廷桂嚴鞠尋奏湖廣人盧宗寄居四川因私事造蜚語無主使者論斬六年疏請以建昌屬河西寧番兩土司及阿都阿史紐結至溪諸地改土歸流河東宣慰司以其地之半改隸流官升建昌爲府領三縣並釐定營汛職制及善後諸事下部議如所請定新設府曰甯遠縣曰西昌冕寧鹽源又請改岷州兩土司歸流尋分疏請升四川達州陝西秦階二縣爲直隸州七年又分疏請升甘肅肅州爲直隸州陝西子午谷隘口增防守官兵裏塘巴塘諸地置宣撫安撫諸司至千百戶視流官例題補俱議行雷波土司爲亂遣兵討平之靖州諸生曾靜遣其徒張熙投書鍾琪勸使反鍾琪與設誓具得靜始末疏聞上褒鍾琪忠遣侍郎杭奕祿等至湖南逮鞠治語詳杭奕祿傳羅卜藏丹津之敗也走投準噶

爾其曾策妄阿喇布坦納之策妄阿喇布坦死子噶爾丹策零立數侵掠喀爾喀諸部上命傅爾丹爲靖邊大將軍屯阿爾泰山出北路鍾琪爲寧遠大將軍屯巴里坤出西路討之加鍾琪少保以四川提督紀成斌等參贊軍務鍾琪率師至巴里坤築東西二城備儲背簡卒伍爲深入計八年五月召鍾琪及傅爾丹詣京師授方略鍾琪請以成斌護大將軍印科舍圖嶺者界巴密巴里坤間鍾琪設牧廠於此準噶爾聞鍾琪方入覲乘間以二萬餘人入犯盡驅駝馬去成斌使副參領查廩以萬人護牧廠寇至不能禦走過總兵曹勳壘呼救勳以輕騎往赴戰敗亦走總兵樊廷及副將冶大雄等將二千人轉戰七晝夜總兵張元佐督所部夾擊拔出兩卡倫官兵還所掠駝馬強半成斌欲罪查廩旣而釋之以捷聞上已遣鍾琪還鎮上謂當於卡倫外築城駐兵出游兵擊敵俾不敢深入令鍾琪詳議尋諭獎廷大雄元佐功賜金子世職遣內務府總管鄂善齎銀十萬犒師立祠安西祀陳亡將士上以酒三爵遙酌亦俾鄂善齎往設祭九年春鍾琪請移兵駐吐魯番巴爾庫爾爲深入計上諭曰鍾琪前旣輕言長

驅直入又爲敵盜駝馬旣恥且憤必欲進剿直搗巢穴能必勝乎九年正月鍾琪部兵有自敵中脫歸者言噶爾丹策零將移駐哈喇沙爾以大隊赴西路而令其將小策零多敦卜犯北路鍾琪以聞並言敵將自吐魯番侵哈密擾安西肅州邊界我軍衆寡莫敵當持重堅壁固守告北路遣兵應援並調兵自無克克嶺三面夾擊上諭曰前以鍾琪軍寡諭令持重堅守今已有二萬九千人樊廷馬步二千敵彼二萬轉戰七晝夜猶足相當乃以二萬九千人而云衆寡莫敵何懦怯至此且前欲直搗伊犁豈有賊至數百里內轉堅壁而不出乎賊果至巴爾庫爾即敗逃亦從科舍圖直走伊爾布爾和邵而遁無克克嶺相去二三百里安所得夾擊鍾琪於地勢軍機茫然不知朕實爲煩憂三月準噶爾二千餘犯吐魯番成斌遣廷將四千人赴援敵引退四月又以千餘人犯吐魯番別以二百餘人犯陶賴卡倫六月又以二千餘人圍魯谷慶城吐魯番回目額敏和卓等率所部奮擊殺二百餘人鍾琪議令元佐勦及張存孝將三千人赴援提督顏清如將二千人屯塔庫成斌將四千人防陶賴俟我軍進擊烏魯木

齊移回民入內地上諭鍾琪今年秋間襲擊是第一善策援吐魯番乃不得已之舉若但籌畫應援而不計及襲擊是舍本而逐末也魯谷慶城圍四十餘日不下準噶爾移攻哈喇火州城以梯登回民擊殺三百餘人元佐等兵將至敵引退七月準噶爾大舉犯北路傅爾丹之師大敗於和通腦兒鍾琪請乘虛襲擊烏魯木齊上諭鍾琪賊既得志於北路今冬仍往西路且增添賊衆更多於侵犯北路俱未可知當先事圖維臨時權變勿貪功前進勿坐失機宜並令略行襲擊即撤兵回營鍾琪自巴爾庫爾經伊爾布爾和邵至阿察河遇敵擊敗之遂至厄爾穆河敵踞山梁以距鍾琪令元佐將步兵爲右翼成斌將馬兵爲左翼勦及總兵王緒級自中路上山參將黃正信率精銳自北山攻敵後諸軍奮進奪所踞山梁敵敗走謀言烏魯木齊敵帳盡徙乃引兵還疏聞上獎鍾琪進退遲速俱合機宜十二月上追舉科舍圖之役責成斌怠忽降沙州副將十年正月銳兒泉遯卒遇敵殺其二掠其一以去鍾琪劾副將馬順上併以鍾琪下部察議俄準噶爾三千餘人犯哈密鍾琪令勦成斌將五千人自回落兔大

坂總兵紀豹將二千人自科舍圖嶺分道赴援又令副將軍石雲倬常賚鎮安將軍卓爾分地設伏待敵占天生圈山口顏清如屯塔爾那沁遣參將米彪副將陳經綸分道禦戰敵引去勦等將至二堡遇準噶爾五千餘人即縱兵奮戰一晝夜敵登山勦督兵圍山力戰至午敵潰遁勦自二堡至柳拊泉與經綸及副將焦景竑軍會乘夜追勦鍾琪使告雲倬等遣兵至無克克嶺待敵疏聞上獎慰之鍾琪議城穆壘駐軍並命乘勝興工雲倬等至無克克嶺鍾琪令速赴梯子泉阻敵歸路卓爾繼其後雲倬遲發一日敵自陶賴大坂西越向納庫山遁去師至敵駐軍處餘火猶未息雲倬又令毋追襲鍾琪劾雲倬僨事奪官逮京師治罪以張廣泗代爲副將軍上諭曰岳鍾琪素諳軍旅本非庸才但以懷游移之見致戰守乖宜前車之鑒非止一端嗣後當痛自省惕壹號令示威信朕猶深望之大學士鄂爾泰等劾鍾琪專制邊疆智不能料敵勇不能殲敵降三等侯削少保仍留總督銜護大將軍印六月鍾琪疏報移軍穆壘尋召鍾琪還京師以廣泗護印廣泗劾鍾琪調兵籌餉統馭將士種種失宜穆壘形如釜

底不可駐軍議分駐科舍圖烏蘭烏蘇諸地上命還軍巴爾庫爾盡奪鍾琪官爵交兵部拘禁十一年以查郎阿署大將軍又論鍾琪驕蹇不法且劾成斌元佐疏防上命斬成斌元佐降調又劾勦縱賊上命斬勦十二年大學士等奏擬鍾琪斬決上改監候乾隆二年釋歸十三年師征大金川久無功三月高宗命起鍾琪予總兵銜至軍即授四川提督賜孔雀翎時經略大學士訥親視師而廣泗以四川總督主軍事大金川曾莎羅奔居勒烏圍其兄子郎卡居噶拉依鍾琪至軍訥親令攻黨壩上以軍事諮鍾琪鍾琪疏言黨壩爲大金川門戶礪卡嚴密漢土官兵止七千餘臣商諸廣泗請益兵三千廣泗不應廣泗專主自昔嶺卡撤進攻此二處中隔噶拉依距勒烏圍尙百餘里黨壩至勒烏圍僅五十里若破康八達即直擣其巢臣商諸廣泗廣泗不謂然而廣泗信用土舍良爾吉及漢奸王秋等恐生他虞訥親亦劾廣泗老師糜餉詔逮治亦罷訥親大學士傅恆代爲經略鍾琪奏請選精兵三萬五千人出黨壩及瀘河水陸並進萬人自甲索攻馬牙岡乃當兩溝與黨壩軍合直攻勒烏圍卡撤留兵八

千侯克勒烏圍前後夾攻噶拉依黨壩留兵二千護糧正地留兵千防溫河餘
四千往來策應期一年擒莎羅奔及郎卡臣雖老請肩斯任命傅恆籌議傅恆
用其策鍾琪自黨壩攻康八達山梁大破賊師進戰塔高山梁復屢破賊鍾琪
初佐年羹堯定西藏莎羅奔以土目從軍及爲總督以羹堯所割金川屬塞還
莎羅奔且奏給印信號紙莎羅奔以是德鍾琪師入莎羅奔懼遣使詣鍾琪乞
降鍾琪請於傅恆以十三騎從入勒烏圍開諭莎羅奔請奉約束頂經立誓次
日率郎卡從鍾琪乘皮船出詣軍前降上諭獎鍾琪加太子少保復封三等公
賜號曰威信入覲命紫禁城騎馬免西征追償銀七十餘萬官其子沔芳侍衛
賜詩褒之尋命還鎮十五年西藏珠爾默特爲亂鍾琪出駐打箭爐事旋定十
七年雜谷土司蒼旺爲亂鍾琪遣兵討擒之十九年重慶民陳琨爲亂鍾琪力
疾親往捕治還卒於資州賜祭塋設襄勤上以所封公爵不世襲予一等輕車
都尉令其子瀚襲鍾琪沈毅多智略御士卒嚴而與同甘苦人樂爲用世宗屢
獎其忠誠遂命專征終清世漢大臣拜大將軍滿洲士卒隸麾下受節制鍾琪

一人而已既廢復起大金川之役傳恆倚以成功高宗御製懷舊詩列五功臣中稱爲三朝武臣巨擘云超龍昇龍弟初冒劉姓名曰傑入伍屢遷建昌左營守備引見聖祖垂詢乃復本姓名超擢東川營游擊以避鍾琪改西甯左營雍正二年授河州協副將勦定鐵布等衆亂番又以避鍾琪改張家口協六年遷天津總兵八年擢湖廣提督烏蒙亂超龍令總兵張大有率副將何勉參將母椿齡討平之尋遣兵分防貴州界上以深合機宜嘉之十年卒鍾璜超龍子雍正七年以鍾琪奏赴西路軍効力授藍翎侍衛除鑾儀衛治儀正乾隆初擢四川威茂鎮參將再遷總兵歷建寧南頓開化昭通諸鎮擢廣西提督鍾琪卒代爲四川提督疏言松潘總兵例出塞化番三年一度番性多猜調集守候彼此互防甚非所願又見小道遠費鉅託病不至惟附近土司領賞有名無實請停止以節勞費上從之金川土舍郎卡侵革布什咱土司革布什咱合九土司兵攻金川相持數年未決郎卡乞令罷兵鍾璜率兵出塞至拉必斯滿安營召郎卡出令還所侵地及所掠穆爾津圖諸土司番民九土司之兵悉罷旋卒賜祭

奎謚莊恪溶鍾琪子以二品廕生授安西同知擢口北道再擢山東布政使六年調山西署山東巡撫鍾琪出師命溶送至肅州八年召鍾琪詣京師命溶就省乾隆元年請免郟城蘭山諸縣水衝地應徵丁米尋調江西三年請免南昌府屬浮糧三萬七千餘兩復疏請發帑修築豐城江隄溶江關河口議行社倉皆允所請兩江總督楊超曾劾溶與屬吏朋比納賄坐奪官六年授光祿寺卿出爲福建按察使再遷廣東巡撫調雲南兩廣總督陳大受劾溶誤舉糧道明安以婪贓敗又採木修隄任屬吏作弊召還京師十八年授鴻臚少卿轉通政使參議卒溶在巡撫任虧庫項鍾琪請以公俸按年扣還上特命免之

策棱博爾濟吉特氏蒙古喀爾喀部人元太祖十八世孫圖蒙肯號班珠爾興黃教西藏達賴喇嘛賢之號曰賽音諾顏其第八子丹津生納木札勒納木札勒生策棱康熙三十一年丹津妻格楚勒哈屯自塔密爾携策棱及其弟恭格喇布坦來歸聖祖授策棱三等阿達哈哈番賜居京師命入內廷教養四十五年尙聖祖女和碩純愍公主授和碩額駙尋賜貝子品級詔携所屬歸牧塔密

爾五十四年命赴推河從軍出北路防禦策妄阿喇布坦五十九年師征準噶爾策棱從振武將軍傅爾丹出布拉罕至格爾額爾格屢破準噶爾獲其宰桑貝坤等百餘人俘馘甚衆戰烏蘭呼濟爾焚敵糧師還道遇準噶爾援兵復擊敗之授札薩克策棱生長漠外從軍久習知山川險易憤喀爾喀爲準噶爾凌藉銳自磨厲練猛士千隸帳下爲親兵又以敵善馳突而喀爾喀無紀律節制每游獵及止而駐軍皆以兵法部勒之居常欽欽如臨大敵由是賽音諾顏一軍雄漠北雍正元年世宗特詔封多羅郡王二年入覲命偕同族親王丹津多爾濟駐阿爾泰並授副將軍詔策棱用正黃旗蠡五年偕內大臣四格等赴楚庫河與俄羅斯使瓦薩立石定界事畢陳兵鳴礮謝天議罪當削爵上命改削俸九年從靖邊大將軍順承郡王錫保討噶爾丹策零偵賊自和通呼爾哈諾爾窺圖壘茂海奎素諸界偕翁牛特部貝子羅卜藏等分兵擊卻之準噶爾諸酋有大策零敦多卜小策零敦多卜皆噶爾丹策零同族最用事噶爾丹策零遣大策零敦多卜將三萬人入掠喀爾喀聞錫保駐察罕度爾振武將軍傅爾

丹軍科布多乃遣其將海倫曼濟等將六千人取道阿爾泰迤東分擾魯克倫及鄂爾喀喇烏蘇留餘衆於蘇克阿勒達呼爲聲援策棱偕丹津多爾濟迎擊至鄂登楚勒遣台吉巴海將六百人宵入敵營誘之出追伏兵突擊斬其驍將餘衆驚潰大策零敦多卜及海倫曼濟等遁去詔進封和碩親王賜白金萬尋授喀爾喀大札薩克十年六月噶爾丹策零遣小策零敦多卜將三萬人自奇蘭至額爾德畢喇色欽策棱偕將軍塔爾岱禦於本博圖山未至準噶爾掠克爾森齊老分兵襲塔密爾掠策棱二子及牲畜以去策棱不及援侍郎綽爾鐸以轉餉至語策棱曰王速率兵遇敵歸路當大破敵策棱還軍馳擊距敵二日程初招丹津多爾濟赴援不至準噶爾兵趨額爾德尼昭八月策棱率兵追敵十餘戰敵屢敗小策零敦多卜據杭愛山麓逼鄂爾坤河而陳策棱令滿洲兵陳河南而率萬人伏山側蒙古諸軍陳河北遂戰敵見滿洲兵背水陳兵甚弱意輕之越險進滿洲兵卻走準噶爾兵逐之策棱伏起自山下如風雨至斬萬餘級谷中尸爲滿獲牲畜器械無算小策零敦多卜以餘衆渡河蒙古兵待

其半渡擊之多入水死河流盡赤錫保馳疏告捷首表策棱功上嘉悅賜號超勇錫黃帶諭此次軍功非尋常勞績可比隨征兵弁著從優加倍議敘上以策棱牧地被寇資馬二千牛千羊五千白金五萬賑所屬失業者並命城塔爾密建第居之十二月進固倫額駙時純愨公主已薨追贈固倫長公主十一年定邊大將軍平郡王福彭統軍駐烏里雅蘇臺詔策棱佩定邊左副將軍印進屯科布多尋授盟長十二年五月召來京諮軍務六月移軍察罕度爾十三年準噶爾乞和請以哲爾格西喇呼魯烏蘇爲喀爾喀游牧界上諸策棱策棱謂向者喀爾喀游牧尙未至哲爾格西喇呼魯烏蘇此議可許惟準噶爾游牧必以阿爾泰山爲界空其中爲甌脫準噶爾不從乾隆元年師還命策棱將喀爾喀兵千五百人駐烏里雅蘇臺分防鄂爾坤上以策棱母居京師策棱在軍久不得朝夕定省命送歸游牧並賜白金五千治裝二年準噶爾策零貽書策棱稱爲車臣汗中前請策棱以聞上命策棱以已意爲報書書曰阿爾泰爲天定邊界爾父琿台吉時阿爾泰迤西初無厄魯特游牧自滅噶爾丹我來建城駐兵

其地衆所共知其不令爾游牧者原欲以此爲隙地兩不相及以息爭端今台吉反云難以讓給試思阿爾泰爲誰地誰能讓給爾誠遵上指定議我必不爲禍始亦不復居科布多又謂我等哨兵逼近阿爾泰宜向內撤哨兵乃聖祖時舊例即定界豈能不設台吉其思之冬準噶爾使達什博爾濟奉表至命策梭偕詣京師三年春至京師噶爾丹策零表請喀爾喀與準噶爾各照現在駐牧上召達什博爾濟入見諭曰蒙古游牧冬夏隨時遷徙必指定山河爲界彼此毋得踰越遣侍郎阿克敦等使準噶爾與達什博爾濟偕往冬噶爾丹策零復使哈柳從阿克敦等奉表至請循布延圖河南以博爾濟昂吉勒圖無克克嶺噶克察諸地爲界北以遜多爾庫奎多爾多輝庫奎至哈爾奇喇博木喀喇巴爾楚克諸地爲界準噶爾人不越阿爾泰山蒙古居山前亦止在扎卜堪諸地兩不相接并乞移托爾和布延圖二卡倫入內地上以所議準噶爾不越阿爾泰山定界已就範惟移托爾和布延圖二卡倫不可許四年春賜敕遣還哈柳詣策梭哈柳曰額駙游牧部屬在喀爾喀何弗居彼策梭答曰我主居此子惟

隨主居喀爾喀特予游牧耳哈柳又曰額駙有子在準噶爾何不令來京答曰予蒙恩尙公主公主所出乃予子他子無與也即爾送還予必請於上誅之冬噶爾丹策零使哈柳復奉表至始定議準噶爾不過阿爾泰山梁不復言徙卡倫事自雍正間與準噶爾議界策楞三詣京師準噶爾憚其威重卒如上指上獎策楞忠子陷準噶爾不復以爲念乃用宗室親王例封其子成袞扎布世子五年命勘定喀爾喀游牧毋越扎布堪齊克慎哈薩克圖庫克嶺諸地與準噶爾各守定界六年上以策楞老命移軍駐塔密爾初喀爾喀凡三部及是土謝圖汗十七旗滋息至三十八旗乃分二十旗與策楞爲賽音諾顏部以鄂爾昆河西北烏里雅蘇河爲游牧爲三部屏蔽自此喀爾喀爲四部十五年病篤上遣其次子車布登扎布還侍使侍衛德山等往存問尋卒遺言請與純愨公主合葬喪至京師上親臨奠命配享太廟諡曰襄御製詩輓之子八最著者長子成袞扎布次子車布登扎布成袞扎布初授一等台吉乾隆元年封固山貝子四年封世子賜杏黃轡十五年襲扎薩克親王兼盟長授定邊左副將軍十七

年入覲十八年杜爾伯特台吉車凌等內附成袞扎布遣兵赴烏里雅蘇臺防
準噶爾追兵準噶爾宰桑禡木特以二百人追入邊上命母縱使還禡木特逸
去詔以責成袞扎布十九年命移軍烏里雅蘇臺尋罷定邊左副將軍命赴額
爾齊斯督屯田二十年師定伊犁屯田兵撤還仍駐烏里雅蘇臺二十一年和
托輝特青袞咱卜謀爲亂成袞扎布發其謀八月亂作仍授定邊左副將軍率
師討之賜三眼孔雀翎十二月獲青袞咱卜賜杏黃帶二十二年輝特巴雅爾
爲亂正月授定邊將軍率師赴巴里坤捕治十二月入覲復授定邊左副將軍
駐烏里雅蘇臺二十六年以準噶爾及回部悉平請展喀爾喀界下軍機大
臣議以附近烏魯木齊四汛令索倫綠旗兵駐防自蘇伯昂阿至烏拉克沁伯
勒齊爾十一汛令成袞扎布督理二十八年入覲二十九年以烏里雅蘇臺城
圯請築城舊址外立木柵內實以土引水環之報聞三十六年卒子七獲青袞
咱卜封其第四子占楚布多爾布爲世子代掌扎薩克卒命其長子輔國公額
爾克沙喇代掌扎薩克卒命次子輔國公伊什扎布楚代掌扎薩克及成袞扎

布卒以第七子拉旺多爾濟襲扎薩克親王拉旺多爾濟尙高宗女固倫和靖公主授固倫額駙從征臨清石峯堡有功嘉慶八年閏二月仁宗乘輿入順貞門有陳德者伏門側突出侍衛丹巴多爾濟禦之被三創拉旺多爾濟援其腕乃獲而誅之賜御用補褂封其子巴彥濟爾噶勒輔國公車布登扎布初授一等台吉額爾德尼昭之役力戰被創封輔國公賜雙眼孔雀翎十七年成衮扎布請析所部授車布登扎布自爲一旗上允之別授扎薩克十九年督兵剿撫烏梁海獲準噶爾宰桑賜貝子品級二十年師征伊犁車布登扎布將三百騎自察罕呼濟爾疾馳至集賽擒宰桑齊巴漢偵達瓦齊所在奪舟渡伊犁河遂達瓦齊封多羅貝勒阿睦爾撒納謀以伊犁叛車布登扎布首發其奸密以告將軍班第師還命招降烏梁海部落即以隸焉二十一年烏梁海酋郭勒卓輝僞言哈薩克汗阿布賚與阿睦爾撒納連和上命率師討之有宰桑固爾班和卓者攜千餘戶赴烏梁海謀偕遁車布登扎布麾兵捕治殲其衆遂進兵哈薩克界會尙書阿里衮自伊什勒諾爾轉戰至汗扎爾會斬獲無算封多羅郡王

成袞扎布討青衮咱卜召車布登扎布還烏里雅蘇臺爲佐二十二年代成袞扎布署定邊左副將軍尋命兆惠代成袞扎布爲定邊將軍而以車布登扎布爲之副二十三年正月授定邊右副將軍從兆惠出巴里坤遣兵赴喀什喀格
斯搜逸寇尋命赴博囉塔拉捕布庫察罕哈薩克錫喇等哈薩克部人擒布庫
察罕哈薩克錫喇及宰桑鄂哲特等走和落霍斯車布登扎布督兵逐之哈薩
克錫喇度不得脫悉衆據高岡拒戰部將以兵寡請待其走擊之車布登扎布
持不可麾兵急進擒鄂哲特哈薩克錫喇僅以身免詔以其父超勇號賜之鄂
哲特械至京師言車布登扎布身先士卒所向無前上益嘉歎賜金黃帶車布
登扎布進次阿布勒噶爾哈薩克縛布庫察罕以獻因請赴阿克蘇與將軍兆
惠會上命還伊犁進親王品級尋以在軍久令歸游牧休息二十四年令佐將
軍兆惠進葉爾羌討霍集占旋復命還伊犁二十七年使西藏三十六年代成
袞扎布爲定邊左副將軍授盟長以牟利被計罷左副將軍擅請展牧界創親
王品級命以郡王兼扎薩克世襲四十七年卒子三不勒多爾濟襲

論曰世傳鍾琪長身類面隆準而駢脅臨陳挾二銅鏈重百餘斤指麾嚴肅不可犯軍西陲久番部皆聞其名其受莎羅奔降也傳恆升輦坐鍾琪戎服佩刀侍莎羅奔出語人曰我曹仰岳公如天人乃傅公儼然踞其上天朝大人誠不可測也策梭白哲微髡善用兵所部多奇士有脫克渾者日行千里登高張兩手若雕鼓翼調敵敵不之察事定策梭欲官之辭賚以千金酌酒勞之脫克渾請出侍姬舞起而歌慷慨策梭大悅卽以姬及所乘馬賜之載籍言名將往往舉其狀貌及其軼事使讀者慕焉鍾琪忠而毅策梭忠而勇班諸衛霍郭李之倫毋謂古今人不相及也

清史稿

列傳八十四

查郎阿

傅爾丹

馬爾賽

李秋

慶復

李贊祥

張廣泗

查郎阿字松莊納喇氏滿洲鑲白旗人曾祖章泰以軍功授拖沙喇哈番祖查爾海復以軍功進一等阿達哈哈番父色思特死烏蘭布通之戰查郎阿襲世職兼佐領遷參領雍正元年授吏部郎中二年超擢侍郎署鑲黃旗滿洲都統五年遷左都御史仍治吏部事是歲冬西藏噶布倫阿爾布巴等爲亂戕總理藏務貝子康濟鼐扎薩克台吉頗羅鼐馳聞上命查郎阿偕副都統邁祿率兵入藏六年擢尙書秋師至藏駐藏副都統馬喇等已擒阿爾布巴即按誅之並殲其餘黨查郎阿奏移達賴喇嘛暫居裏塘留兵二千交駐藏大臣調遣又奏請以頗羅鼐總理後藏而前藏達賴喇嘛未還畢昭新授噶布倫虛未妥協並令頗羅鼐兼領皆從之七年命查郎阿至西安留佐川陝總督岳鍾琪專理軍

需鍾琪授大將軍出師令署川陝總督兼西安將軍加太子少保八年命往肅州專理軍需九年析置四川陝西兩總督查郎阿改署陝西總督十年召鍾琪還京師以查郎阿署甯遠大將軍命大學士鄂爾泰馳驛往肅州授方略並賜白金萬十一年疏劾副將紀成斌防庾集總兵張元佐防無克克嶺敵入掠糧車漫無偵察上命斬成斌元佐坐降調又劾總兵曹勳防哈密縱賊妄報上命斬勳又劾副都統阿克山觀音保牧馬多死玩悞軍事下部議當斬查郎阿復奏阿克山觀音保所部兵久居南方不知牧馬法視退縮竊換者有間請暫免死令於通衢荷校徧示諸軍十三年噶爾丹策凌乞和命查郎阿撤兵奏請留兵戍哈密及三堡沙爾塔勒納沁諸城並於南山大坂無克克嶺塔勒納沁河源分設斥堠又奏於安西及赤金靖逆柳溝布隆吉爾橋灣五處分兵駐防部議如所請授文華殿大學士兼兵部尙書仍改陝西總督爲川陝總督乾隆元年疏言甘肅地瘠請撥陝西倉糧預籌協濟命會巡撫劉於義確議尋請撥陝西倉糧八萬石運貯慶陽涇州靜甯固原諸處從之疏劾甘肅巡撫許容匿

災營私上命奪容官逮治秋入覲諭速回任奏言軍中馬駝被竊當責大將軍
償補雍正十年以前岳鍾琪任之十一年臣任之惟鄂爾多斯牧廠所失及歷
年馬駝多斃請免追償上許之三年奏劾肅州道黃文煒軍需道沈青崖等侵
帑並及於義徇庇遣左都御史馬爾泰會鞠論罪章嘉呼圖克圖請以裏塘巴
塘界達賴喇嘛查郎阿奏聖祖時克西藏收裏塘巴塘內屬章嘉胡圖克圖以
日用不敷爲辭藏中大小廟千餘常住喇嘛四十餘萬需用良鉅請視裏塘巴
塘諸地每歲徵收數目以打箭爐商稅撥予達賴喇嘛地仍內屬如故上嘉納
之甯夏地震查郎阿馳往賑撫五年命還京入閣治事加太子太保六年命與
侍郎阿里衮清察黑龍江吉林烏喇開墾地畝十二年以衰病命致仕尋卒
傅爾丹瓜爾佳氏滿洲鎮黃旗人費英東曾孫倭黑子也康熙二十年襲三等
公兼佐領授散秩大臣四十三年上西巡駐驛祁縣鄭家莊於行宮前閱太原
城守兵騎射有卒馬驚逸近御仗傅爾丹直前勒止之擇其人上下悅諭獎傅
爾丹賜貂皮褂尋授正白旗蒙古都統四十八年授領侍衛內大臣五十四年

以託疾未入直罷領侍衛內大臣命率土默特兵千赴烏蘭固木等處屯田五十六年復授領侍衛內大臣師討噶爾丹授富甯安靖逆將軍出西路傅爾丹振武將軍出北路駐軍阿爾泰五十七年疏請與富甯安分路進兵諭定師期傅爾丹請與征西將軍祁里德將萬二千人以七月出布魯爾直抵額爾齊斯河會策妄阿喇布坦使來乞和令暫停進取繕兵防守上欲於烏蘭固木科布多築城衛喀爾喀游牧命傅爾丹相度具奏五十八年春傅爾丹疏請築城鄂勒齊圖郭勒上以鄂勒齊圖郭勒距師遠命更於科布多築城傅爾丹復疏言科布多阻大河材木難致請築城察罕庚爾距鄂勒齊圖郭勒千里中設十一站上從之五十九年將八千人自布拉罕進次格爾額爾格準噶爾兵潰擊斬二百餘級擒宰桑等百餘盡降其衆又焚烏蘭呼濟爾敵糧引還雍正元年命兼統祁里德軍分兵駐巴里坤三年召還授內大臣四年授黑龍江將軍六年授吏部尙書賜雙眼孔雀翎初青海羅卜藏丹津敗走準噶爾策妄阿喇布坦納之上屢遣使索獻策妄阿喇布坦亦遣使請和上罷兩路兵久之議未決策

妄阿喇布坦死子噶爾丹策零嗣屢犯邊七年二月上命廷臣集議大學士朱軾左都御史沈近思皆言天時未至副都統達福亦言不可惟大學士張廷玉贊用兵上意乃決復出師命傅爾丹爲靖邊大將軍出北路發京師八旗兵六千車騎營兵九千奉天等處兵八千八百以巴賽爲副將軍順承郡王錫保掌振武將軍印陳泰袞泰石禮哈岱豪達福覺羅海蘭爲參贊定壽將前鋒魏麟閃文緒將車騎營納秦將奉天兵塔爾岱西彌賴將索倫兵費雅思哈將寧古塔兵阿三將右衛兵素圖將寧夏兵承保常祿將察哈爾兵馬爾齊袞布將土默特兵丹巴沙津達賴將喀喇沁土默特兵法敏伊都立巴泰西琳傅德理饒永國護印上祭告太廟幸南苑閱車騎營兵御太和殿行授鉞禮賜傅爾丹御用朝珠黃帶紫轡白金五千加少保出駐阿爾泰八年噶爾丹表請執羅卜藏丹津以獻上命緩進兵尋召與鍾琪同詣京師議軍事遣還軍九年疏言科布多爲進兵孔道請仍於此築城下廷議如所請六月傅爾丹移軍科布多噶爾丹策零遣所部喀蘇爾海丹巴爲間爲守卡侍衛所獲詰之曰噶爾丹策零發

兵三萬使大策零敦多卜小策零敦多卜分將犯北路小策零敦多卜已至察罕哈達大策零敦多卜以事宿留未至傅爾丹信其語計及其未集擊之令選兵萬人循科布多河西以進素圖岱豪爲前鋒定壽等領第一隊馬爾賽等領第二隊傅爾丹舉大兵繼其後令袁泰護築城陳泰屯科布多河東斷奇蘭道六月庚子師發科布多定壽等進次雅克賽河獲準噶爾羅卒言距察罕哈達止三日程準噶爾兵不過千人未立營傅爾丹命乘夜速進行數日不見敵戊申獲諜言準噶爾兵二千屯博克托嶺傅爾丹遣蘇圖岱豪將三千人往擊之敵出羸兵誘師而伏二萬人谷中已酉定壽師次庫列圖嶺遇敵斬四百餘級敵驅駝馬踰嶺遁庚戌傅爾丹師至蘇圖定壽皆會辛亥逐敵入谷伏發據高阜衝擊傅爾丹督戰殺敵千餘塔爾岱馬爾齊督兵奪西山敵據險師攻之不能克壬子傅爾丹令移軍和通呼爾哈諾爾定壽素圖覺羅海蘭常祿西彌賴據山梁東塔爾岱馬爾齊據其西承保居中馬爾薩出其東達福岱豪當前舒楞額沙津達賴等護後師甫移敵力攻山梁東西二軍定壽等奮戰大風雨雹

師爲敵所圍傅爾丹遣兵接塔爾岱出又令承保援定壽日暮圍未解癸丑海
蘭突圍出定壽蘇圖馬爾齊皆自殺西彌賴令索倫兵赴援兵潰亦自殺甲寅
敵環攻大營傅爾丹督兵禦之殺敵五百餘科爾沁兵潰沙津達賴奮戰入敵
陳師望見其難曰土默特兵陷賊矣遂大潰乙卯永國海蘭岱豪皆自殺傅爾
丹雜士伍中以出敵大集查弼納巴賽達福馬爾薩舒楞額皆戰死傅爾丹率
殘兵渡哈爾噶納河敵追至擊殺五百餘人七月壬戌朔還至科布多收餘兵
僅存二千餘方戰科爾沁蒙古兵先敗傅爾丹聞人言謂先敗者土默特兵也
劾沙津達賴論斬歸化城土默特副都統袞布降敵戮其孥傅爾丹疏請罪上
諭曰損兵誠有罪朕因爾等竭蹶力戰特寬恕之痛惻難忍不覺淚下解朕親
束帶賜傅爾丹爾等毋妄動敵至能堅守即爾等之功科布多不能守可還軍
察罕庾爾傅爾丹復疏請罪上諭曰輕信賊言冒險深入中賊詭計是爾之罪
至不肯輕生自殺力戰全歸此爾能辨別輕重事定朕自有處置尋命以錫保
爲靖邊大將軍傅爾丹掌振武將軍印協辦軍務十年七月準噶爾侵烏遜珠

勒錫保令傅爾丹將三千人禦之敗績錫保疏劾能領侍衛內大臣振武將軍
削公爵十一年錫保再疏劾傅爾丹上察傅爾丹兵寡原其罪命留軍効力十
三年伊都立等侵軍餉事發辭連傅爾丹命侍郎海望逮詣京師下獄並追論
和通呼爾哈諾爾及烏遜珠勒失機罪王大臣等依律擬斬命未下世宗崩高
宗即位命改監候乾隆四年與岳鍾琪並釋出獄十三年師討大金川未下授
內大臣護軍統領赴軍尋命署川陝總督與鍾琪治軍事大學士傅恒出爲經
略奏傅爾丹衰老惟熟於管理滿洲兵請令專治營壘諸事十四年命爲參贊
大金川師罷授黑龍江將軍十七年卒賜祭塋諡溫愍子兆德襲爵哈達哈自
有傳傅爾丹頽然嶽立面微頹美鬚髯其爲大將軍廷玉實薦之鍾琪嘗過其
帳見壁上刀梨森然問安用此傅爾丹曰此吾所素習者懸以勵衆鍾琪出曰
爲大將不恃謀而恃勇敗矣

馬爾賽馬佳氏滿洲正黃旗人大學士三等公圖海孫馬爾賽襲爵康熙間迭
授護軍統領鑲黃旗蒙古都統領侍衛內大臣掌鑾儀衛事雍正二年加贈圖

海一等公號曰忠達仍以馬爾賽襲調鑲藍旗滿洲六年授武英殿大學士兼吏部尚書八年命與大學士張廷玉蔣廷錫詳議軍行事宜尋以翊贊機務加一等阿達哈哈番世職九年靖邊大將軍傅爾丹討噶爾丹策零師敗績授撫遠大將軍調西路副將軍覺羅伊禮布爲參贊率師駐圖拉馬爾賽師行聞準噶爾將犯科布多奏請暫駐第十五臺俄聞準噶爾兵屯科布多近處又奏請進駐察罕度爾既又聞準噶爾兵至奎素復奏請調蒙漢兵七千人赴推河上責馬爾賽輾轉不定命駐第十四臺待命旋命將蒙漢兵五千人駐翁衮上解傅爾丹靖邊大將軍印授順承郡王錫保諭馬爾賽蒙古諸扎薩克俱遵靖邊大將軍調遣不得以撫遠大將軍印有所徵發尋改授撫遠將軍駐扎克拜達里克十年秋準噶爾大舉內犯掠喀爾喀諸部喀爾喀親王策棱與戰額爾德尼昭大破之餘衆循鄂爾昆河源走推河錫保劄馬爾賽令與建勳將軍達爾濟合軍截擊喀爾喀親王丹津多爾濟亦馳報促馬爾賽發兵馬爾賽集諸將議諾爾琿曰我等當速發兵迎截遲且將不及諸將皆和之獨都統李杓以爲

但當守城馬爾賽以杖言爲然諾爾琿博爾屯等力請傅鼎至跪求馬爾賽持不可達爾濟遣使約會師馬爾賽終不應士卒登城見敵過奮欲出擊參贊胡琳傅鼎不待馬爾賽令將所部以出馬爾賽乃與偕行至博木喀拉令欽拜將七百人逐敵馬爾賽引還準噶爾兵去已遠欽拜等亦無所獲而返胡琳欽拜博爾屯諾爾琿等先後疏報上命奪馬爾賽官爵治罪錫保等請誅馬爾賽及杖部議當貽誤軍機律斬十二月遣副都統索林赴扎克拜達里克斬馬爾賽李林漢軍鑲藍旗人李國翰四世孫降襲三等伯累擢至廣州將軍坐駐防兵閑巡撫官廨逮京師論斬上貸之復授都統仍令襲爵至是責其一言僨事罪與馬爾賽等奪官爵論斬

慶復字瑞園佟佳氏滿洲鑲黃旗人佟國維第六子雍正五年襲一等公授散秩大臣遷鑾儀使兼領武備院事七年授正白旗漢軍副都統八年遷正藍旗漢軍都統九年列議政大臣十一年授工部尙書署刑部調戶部十二年授領侍衛內大臣十三年高宗即位命代平郡王福彭爲定邊大將軍出北路乾隆

元年準喇爾乞和罷兵慶復請沿邊設卡倫以待衛或護軍一專管喀爾喀台吉一協理發土謝圖賽因諾顏扎薩克圖車臣四部兵合三千人歲六月集鄂爾坤出巡九月罷歸牧詔如所請召還京署吏部尙書兼戶部尋員除刑部二年授兩江總督劾江西巡撫俞兆岳貪鄙營私奪官論如律疏言蘇常揚鎮通泰諸屬例徵麥二萬餘石請改徵米從之移督雲貴四年加太子少保五年疏言雲南府屬縣引南汁等六河溉田山溪箐澗水發不常沙石壅遏堤堰易決請以時修治上嘉之又言滇黔粵蜀四省接壤犵苗雜處往往爭界構訟積案莫結如廣西鎮安屬小鎮安土州與雲南廣南屬土目爭剃頭者賴二村臣令詳勘以村入廣西境應歸廣西而廣西又議以小鎮安土州歸雲南盡昭陽關爲界雲南四川於金沙江分界雲南屬江驛七戛則補晉毛諸地越在江外兩省駐汛分防犬牙互制而四川又欲劃江分界見在民夷甯帖應仍舊貫不必紛更其或田在彼境糧在此境當以糧從田俾免牽混下軍機大臣議行又疏言錢價日昂請省城增十爐臨安增五爐發餉銀七錢三下部議行又分疏請

開姚州鹽井南安州屬磧嘉大小猛光回子門諸地招墾浚治金沙江旋移督兩廣疏劾粵海關監督鄭伍養需索侵蝕擬罪如律又疏言瓊州四面環海中有五指山黎人所居請設義學俾子弟就學應試別編黎字州縣額取一名八年又疏言廣西東蘭州自雍正初改土爲流置兵二百戍守水土毒惡山路崎嶇民病於運糧請以其半改駐三旺均從之復移督川陝郭羅克土番處青海界上地寒不能畜牧屢出爲夾壩夾壩華言盜也慶復令捕其酋林噶架立誅之番衆頂經誓奉約束慶復令貧番二百餘戶授地課耕歲五六月許出獵限一次塞限十五人要隘設汛置兵松潘鎮總兵歲出巡駐阿壩番人訟不決詣總兵剖晰上中下三部置土千戶一土百戶二種人爲盜責三土目捕治疏聞下軍機大臣議行又有瞻對公司在打箭爐邊外處萬山中恃險肆劫掠及臺站兵有司捕治上瞻對土目四朗下瞻對土目班滾匿罪人不出十年慶復偕巡撫紀山提督李質粹疏請發兵進剿上命宜妥協周詳毋少疏忽慶福遂發兵質粹進駐東俄洛扼兩瞻對總隘瓊州副將馬良柱出裏塘爲南路松潘總

兵宋宗璋出廿牧爲北路建昌總兵袁士弼出沙晉隆爲中路刻期並發四朗
詣宗璋軍降士弼自據城頂趨納爾格與番人戰加社卡諸地屢勝良柱攻
噶嗎所焚其寨三地雷發番人死甚衆上下膽對夾江而居四朗居江西地曰
撤憾其從子肯朱居江東地曰孺耳班滾亦居江西地曰如郎江東木魯工爲
要隘四朗既降宗璋兵越撤憾駐阿賽去如郎數十里良柱亦逼進如郎質粹
發兵往應班滾力拒宗璋分兵自然多會士弼克臘蓋破底朱良柱亦撫定番
寨四十六班滾請降慶復不許疏入上命毋恃勝輕敵尋授慶復文華殿大學
士仍留總督十一年春慶復進駐東俄洛奏言前克底朱班滾母率頭人至軍
前請降質粹遣令歸臣咨詢質粹令速進兵上責質粹失機慶復又疏劾士弼
意主招降請奪官仍戴罪効力尋自東俄洛進駐靈雀以明正土司汪結及降
人騷達那俄木丁等爲導自茹色以皮船渡破十餘卡逼如郎攻泥日寨圍之
數日焚礮質粹咨慶復言班滾已焚死又言焚礮時火光中望見番酋懸綰慶
復詢於衆俄木丁於爐中得鳥槍銅碗謂班滾物也遂以班滾焚斃疏聞上察

慶復師逼如耶時嘗奏班滾走沙加邦河土口姜錯太迎入寨未言至泥日論慶復班滾渠魁斷不可漏網母留遣孽母墮狡計尋加慶復太子太保慶復又効士弼怯懦乖張奪官逮下刑部論罪十二年大金川土酋莎羅奔爲亂上授張廣泗川陝總督召慶復入閣治事命兼管兵部尋廣泗奏言訊土司汪結言班滾尙匿如耶未死慶復得班滾子沙加七立爲更名德昌喇嘛令仍居班滾大碛冒稱經堂上責慶復欺罔奪官待罪欽差大臣尙書班第奏言師克如耶班滾已逃僅得空寨上逮質粹下刑部獄召宗璋與質粹言曩報班滾焚斃實未親見後聞藏匿山洞亦未告慶復追捕上命下慶復刑部獄令軍機大臣會訊按律定擬坐貽誤軍機律論斬十四年九月賜自盡李質粹漢軍正白旗人雍正初自把總擢藍翎侍衛嘗從年羹堯出師累擢陝西固原提督丁憂命署四川提督附和慶復妄言班滾死慶復死之明年斬質粹

張廣泗漢軍鑲紅旗人以監生入貲授知府康熙六十一年選貴州思州雍正四年調雲南楚雄雲貴總督鄂爾泰討亂苗以廣泗佐其事奏改調黎平五年

擢貴州按察使六年廣泗率兵赴都勻黎平鎮遠清平諸地化導羣苗相機剿撫超授巡撫清平屬丹江苗最悍廣泗遣兵分道攻克小丹江大丹江及雞溝等寨鎮遠屬上九股諸寨與接壤亦次第降下九股清水江古州諸苗悉定疏聞上命與鄂爾泰詳議善後諸事語詳鄂爾泰傳十年廣泗疏言清水江及都江爲黔楚粵三省通流當設哨船聯絡聲勢古州應貯米資成同知以下董理譯人分別勸愒予精並授土官劄付宣布條約化導苗民下部議行敘功授拜他喇布勒哈番世職準噶爾邊甯遠大將軍岳鍾琪率師出西路上授廣泗副將軍召詣京師授方略廣泗至軍鍾琪方自巴爾庫爾移軍穆壘廣泗將四千人出鄂隆吉與鍾琪會於科舍圖至穆壘上召鍾琪還京師命廣泗護大將軍印廣泗疏言穆壘地處兩山間築城其中形如釜底非屯兵進取之地今築城未竟臣與副將軍常賚兩營當要衝兵止二三百即鍾琪營亦僅數百遇警何以抵禦準噶爾專用馬我兵必馬步兼用而鍾琪立意川車沙磧殊非所宜至馬步兵弓箭鳥鎗之外止攜木棍全無刀戟官兵莫不輟議穆壘又無牧地

鍾琪留馬二千餘悉就牧馬蘭烏蘇科舍圖兩地敵人窺伺可虞駐兵數萬人糧運最要地多叢山大嶺車駝分運必繞出沙磧鍾琪聞寇至輒令停運以此遲緩鍾琪張皇剛復號令不明題奏奉到諭旨臨時宣傳莫測誠僞上奪鍾琪官命廣泗還軍巴爾庫爾廣泗奏軍還巴爾庫爾分兵防洮賁無克克嶺斷敵南走道防廋集察罕哈馬爾斷敵西來道巴爾庫爾北爲銳兒泉噶順烏卜圖克勒克諸地東北爲圖古里克特爾庫勒諸地敵自沙磧來處處可通皆置兵守他諸要隘並設卡倫巡護牧廠哈密塔勒納沁皆增兵爲備尋以查郎阿爲大將軍授廣泗正紅旗漢軍都統留軍十一年廣泗將萬餘人分駐北山十二年調寇至烏圖河檄副都統班第達什降調總兵張元佐及提督樊廷選捕越噶順至鄂隆吉大坂擊破之斬四百餘人獲三十六人捷聞命議敘十三年準噶爾乞和師還授湖廣總督自鄂爾泰定苗疆至是九股苗復爲亂尙書張照偕將軍哈元生副將軍董芳率兵討之久無功高宗即位授廣泗經略赴貴州將軍以下聽節制廣泗疏劾阻撓軍機徵集兵數萬元生沿途分布用以攻

剿者不過三千顧此失彼芳駐守八弓僅事招撫巡撫元展成治賑條款紛錯官民並困上爲奪照芳展成等官命廣泗兼領貴州巡撫龍元生將軍以提督聽廣泗驅策十二月廣泗至凱里分兵三道進剿副將長壽出空裨總兵王無黨出台營廣泗督兵出清江地曰雞擺尾刻期並進破上九股卦丁等寨燬其巢餘苗走入牛皮大箐乾隆元年正月廣泗令諸軍合圍獲其渠包利等斬萬餘級諸苗悉定授廣泗雲貴總督兼領巡撫進三等阿達哈哈番世職奏定鎮遠安順大定平遠諸營制增貴州兵額都計二千九百有奇三年復請溶治清水江都江增爐鑄錢皆下部議行五年請入覲會湖廣城步橫嶺等寨紅苗糾粵獠爲亂命廣泗往勘九月授欽差大臣楚粵提鎮以下受節制十一月亂定六年正月至京師乞歸塋賜其父母祭貴州黎平黑苗復糾粵獠爲亂命廣泗還貴州按治獲苗酋石金元等置之法十年加太子少保十一年大金川土司莎羅奔爲亂調川陝總督廣泗至軍小金川土司澤旺土舍良爾吉來降八月遣總兵宋宗璋許應虎分道攻勒烏圖副將馬良柱攻噶拉依副將張興參將

買國良繼進山險礮堅轉戰逾二年師無功十三年疏劾良柱自丹噶撤軍失礮械命逮詣京師上授大學士訥親經略出視師並起岳鍾琪赴軍詔責廣泗師老氣怯調度失機宜廣泗奏報攻克戎布寨五十餘礮諭曰此亦小小攻克耳佇待捷音以慰西顧訥親初至督攻礮師收績總兵任舉爲驍將戰沒乃議令官軍築礮謂與賊共險上以爲非策責廣泗附和推諉嚴諭詰難訥親劾廣泗分十道進兵兵力微弱老師糜餉鍾琪亦劾廣泗玩兵養寇信用良爾吉及漢奸王秋洩軍事於敵上責廣泗貽誤軍機奪官逮至京師上御瀛臺親鞫廣泗極言其枉命用刑辨不已上諭曰金川用兵張廣泗訥親前後貽誤廣泗初至軍妄爲大言旣久無成效則諉過於部將及訥親往乃復觀望推諉見訥親種種失宜無一語相告見其必敗訕笑非議備極險伎蓋恐此時奏聞猶或譴責不若坐視決裂爲得計也朕詳悉推勘如見肺肝訥親且在其術中而不覺矣廣泗熟嫻軍旅與訥親並爲練達政事之大臣乃自逞其私罔恤國事今朕明正其罪以彰國憲下軍機大臣會刑部議罪當失誤軍機律斬十二月斬廣

泗後十日諭並誅訥親

論曰爲三軍擇將豈易言哉查郎阿臨邊未遇敵按殺成斌勅世謂與查廩有連爲修怨甚矣其枉也傅爾丹中敵間師徒撓敗世宗特寬之高宗時復起至與岳鍾琪同視何其倖歟若馬爾賽之畏縮慶復之欺誑當其罪廣泗傾鍾琪効照知訥親不可憾乃坐視其敗以伎殺其身雖有勞不能道吁可畏哉

清史稿

列傳八十五

噶爾弼

法喇

查克丹

欽

常賚

哈元生

子向德

董芳

查弼納

圖 圖 文 書 兵 部

噶爾弼納喇氏滿洲鑲紅旗人父額爾德赫爲敬謹親王尼堪長史屢從征伐
順治十六年署護軍統領偕安南將軍達索等師下厦門擊鄭成功額爾德赫
將右翼獲其將周序命署領海將軍康熙元年還京尋卒雍正間以噶爾弼疏
乞補謚謚果毅噶爾弼初授前鋒參領累遷鑲紅旗護軍統領準噶爾策妄阿
喇布坦遣策零敦多卜襲據西藏康熙五十八年命噶爾弼馳赴四川佐總督
年羹堯治軍事噶爾弼調知策零敦多卜與其副三濟不睦謂其隙可乘疏請
招策零敦多卜降五十九年二月上命平逆將軍延信自青海入西藏而授噶
爾弼定西將軍偕都統武格將四川雲南兵山拉里策零敦多卜自將拒延信
而遣其黨春丕勒宰桑將二千六百人自章米爾戎拒噶爾弼噶爾弼取間道

至莫珠貢喀集皮船渡河直趨西藏八月克之噶爾弼集西藏大小第巴頭目及諸寺喇嘛宣上指安撫封達賴喇嘛倉庫遣兵守隘截準噶爾糧道擒斬策零敦多卜所署置總管喇嘛五策零敦多卜爲延信所破遁走西藏平捷聞上諭曰噶爾弼等遵朕指行師絕域各自奮勵撫定唐古特人民命優敘延信留駐西藏六十年以病召還命噶爾弼佩定西將軍往代尋授鎮藍旗蒙古都統行至洮定橋託病不行年幾竟以聞命奪官逗遛不敢詣京師論斬雍正元年世宗賞其罪賜都統銜從軍迭署固原提督布隆吉爾副將軍授鑲紅旗漢軍都統三年擢奉天將軍五年疏言奉天金銀銅鉛諸鑛雖開採有禁而竊掘尙多惟孟犀湖產鐵爲民間農器所需遼陽黃波羅峪開原打金廠請視錦州大悲嶺例永禁開採下部議行旋卒法喇那木都魯氏滿洲正白旗人父敦泰從達索擊鄭成功戰死母喜塔臘氏守節撫孤法喇初授筆帖式康熙十三年以護軍從討吳三桂自廣東下雲南三十五年以署驍騎參領從征噶爾丹累擢鑲白旗蒙古都統護軍統領準噶爾策妄阿喇布坦遣其族兄策零敦多卜攻

西藏四川提督康泰率師次黃勝關兵譚潰上命法喇馳赴四川佐年羹堯治軍事並按提督標兵譚潰狀法喇察知泰偏信守備汪文藻尅饒請斬文藻及倡亂兵以徇上從之並奪泰官五十七年策零敦多卜戕拉藏汗幽達賴喇嘛遂據有其地法喇遣員外郎巴特瑪等赴裏塘傳諭又令前鋒參領伍林葩化林協副將趙宏基將滿漢兵五百與之偕疏言西藏資茶養生應令松潘禁茶出口裏塘巴塘番寨所需當開具戶口定數買運下所司議行五十八年命法喇出駐打箭爐令副將岳鍾琪率師徇裏塘番曾達瓦喇扎木巴第巴賽卜騰阿珠不從命縛送法喇軍斬以徇進次巴塘第巴喀木布等請降命法喇進駐巴塘五十九年年羹堯請授噶爾弼定西將軍率師入西藏令法喇還駐打箭爐六十年還京師尋以護軍有自戕者不以實奏坐奪官六十一年與千叟宴賜復原銜雍正十三年卒

查克丹博爾濟吉特氏滿洲正黃旗人奉義公恩格德爾曾孫自官學生襲三等阿達哈哈番授頭等侍衛累遷正黃旗護軍統領鑲藍旗蒙古都統雍正三

年署甘州將軍準噶爾使至守備馬德仁等供應失時查克丹疏劾並陳花馬池至甘州驛馬疲羸狀命總督年羹堯嚴察四年還京師授正黃旗滿洲都統五年命率番代兵出北路九年振武將軍順承郡王錫保出北路討準噶爾命查克丹參贊軍務授內大臣十年準噶爾將小策零敦多卜入邊掠喀爾喀諸部查克丹偕額駙策棱等赴奔博圖山敵越察罕度爾入掠杭愛山師逐之至額爾德尼昭大戰破敵查克丹督兵奮擊敵自推河遁走復追至察罕托輝斬馘殆盡以功進二等阿達哈哈番錫保代傅爾丹爲靖邊大將軍仍以查克丹參贊軍務十三年還京師調正紅旗蒙古都統乾隆四年以病再疏乞休命致仕十一年卒賜祭葬諡敏恪欽拜瓜爾佳氏滿洲鎮紅旗人曾祖羅璧勞薩弟也偕來歸有功授一等阿達哈哈番以兼襲兄子程尼世職合爲一等公欽拜改襲一等伯授頭等侍衛累遷正黃旗蒙古副都統雍正元年授兵部侍郎四年以引見失儀上詰責巧辯奪官戍軍臺九年召還復官撫遠大將軍馬爾賽出北路討噶爾丹命欽拜將右衛兵以從參贊軍務授內大臣駐扎克拜達里

克十年振武將軍順承郡王錫保駐察罕度爾奏請移欽拜相佐上諭曰馬爾賽治事甚不愜朕意扎克拜達里克軍中侍欽拜一人當仍留北路準噶爾將小策零敦多卜等自推河走欽拜等力請追擊馬爾賽聽敵過師乃出既至博木喀喇令欽拜將七百人進不及敵而還欽拜等疏聞上誅馬爾賽尋署綏遠將軍十一月復署建勳將軍平郡王福彭代爲定邊大將軍命軍事諮於欽拜乾隆元年還京師出爲青州將軍還在內大臣上行走十二年卒賜祭葬諡肅敏

常賚納喇氏滿洲鎮白旗人鎮安將軍瑪奇子事世宗雍正元年授工部員外郎遷郎中二年調戶部三年授廣東布政使四年擢福建巡撫廣東巡撫楊文乾言福建倉庫虧空上命文乾清理即移常賚署廣東巡撫疏言廣東地卑苦夏秋潦漲廣州肇慶二府尤其請以廣州通判管南海三水隄工肇慶通判管高要高明四會隄工歲冬督隄長修築定保固賞罰水漲護防仍以鴨埠魚笊諸稅充用尋赴福建六年調雲南常賚在廣東盜竊奏摺匣鎖鑰令工私

製將軍標兵匿盜徇不治電白從化盜發隱不奏又與將軍石禮哈等訐文乾上諭曰常賚朕藩邸微員以其謹慎擢至巡撫乃盜失摺匣鑰匿不奏尙得謂無欺乎且與石禮哈等黨同伐異其罪不可貸奪官赴廣東待鞠論斬上推瑪奇下雲南舊功特赦之令從尙書查弼納往陝西治饑八年授刑部侍郎署甯夏將軍九年授鎮安將軍將肅甘涼三州兵五千人自爲一隊備聲援尋授西路副將軍十年準噶爾侵哈密常賚與都統良敦總兵張存孝將滿漢兵三千二百駐無克克嶺禦之旋授內大臣從大將軍岳鍾琪移軍穆壘復從護大將軍張廣泗移軍巴爾庫爾十一年冬署大將軍查郎阿奏方冬雪深請分兵駐防廣泗將萬人駐北山常賚將九千人駐南山十三年命統綠旗兵萬人駐巴爾庫爾提督顏清如尙書馬會伯爲副準噶爾乞和乾隆元年率兵還京師五年以疾致仕予半俸十一年卒賜祭葬

哈元生直隸河間人康熙間入伍授把總累遷建昌路都司坐失察私木過關奪官雍正二年命引見發直隸以守備用補撫標右營守備貴州威甯總兵石

禮哈請以元生從勦仲家苗有勞三年補威甯鎮中軍游擊烏蒙土知府祿萬鍾授東川鎮雄土知府隨慶侯助爲亂鄂爾泰檄元生會四川兵討賊賊據險拒戰元生冒矢石奮攻克之鄂爾泰上其功上獎元生取仲家苗克烏蒙能効力命以副將參將題用尋授尋常營參將六年米貼苗婦陸氏爲亂鄂爾泰令元生往勦破險設伏擣其巢獲陸氏率師赴阿驢破雷波土司以其助陸氏刦糧也賚白金四千遷元江副將師還阿驢夷目從坐事元生鞭之其人大譟圍元生元生率游擊卜萬年等與戰兩晝夜賊敗卻元生督兵奪據赤衣臺鶴龍總兵張耀祖赴援元生出小溜筒江搜斬餘賊阿驢人空寨通拉金者呢諸寨助爲亂並討平之鄂爾泰具以聞上諭曰野夷性反覆即無鞭責事亦未必帖然元生効力多功過相當置不議七年調黎平副將擢安籠總兵八年烏蒙復爲亂鄂爾泰令元生督兵出威甯破賊數萬射殪其渠黑寡暮來連躡賊壘八十里遂克烏蒙賜孔雀翎及冠服賚白金萬九年擢雲南提督上以元生母逾八十子封誥尋調貴州十年召詣京師入對解御衣以賜命在辦理軍機處行

走旋令回籍省親貴州九股苗爲亂命還貴州督勦遭母喪賜祭令在任守制率兵攻九股苗獲悍苗百餘俘斬甚衆餘悉請降十二月進新闢苗疆圖志命巡撫元展成勘訂十三年古州苗爲亂擾黃平元生遣兵擊之總督尹繼善奏調湖廣廣西兵會勦上授元生爲揚威將軍統兵進討而以湖廣提督董芳爲之副尋遣尙書張照爲撫定苗疆大臣元生與之忤乃議劃施秉以上爲上游用雲南貴州兵隸元生施秉以下爲下游用湖廣廣西兵隸芳元生與芳議界詳逮村莊道路文移辨論日久師無功經略張廣泗至劾元生徒事招撫奪官逮京師坐貽誤軍機論斬乾隆元年上命貸其死賜副將銜赴西路軍營効力三年卒上深惜之加總兵銜賜祭葬子尙德初從元生至雲南入伍授千總烏蒙旣克齋疏奏捷上命以游擊題補雲南鶴麗右營游擊遷奇兵營參將乾隆元年廣泗奏尙德奉檄從征因父獲譴阻勉自效擢貴州清江協副將調定廣協三年討平定番州屬姑盧寨苗以父憂歸起湖南辰州副將遷總兵歷宜昌涼州臨元古州諸鎮十三年討大金川命從軍尋爲總督張允隨劾擾民虐

兵坐尊官二十二年賜副將銜赴西路軍營効力以送羊赴軍多斃奪官責償
遣回籍卒

董芳陝西咸甯人初入伍隸督標中式武舉補千總雍正二年師征青海從副
都統達鼐等追獲丹津琿台吉及其孥並羅卜藏丹津女兄四年超授三等侍
衛出爲直隸正定鎮標游擊累遷雲南臨元鎮總兵十一年思茅土酋刁興國
等爲亂芳與提督蔡成貴等率師討之擒興國及助亂土目楊昌祿等斬三千
六百餘人降四萬二千六百餘人總督高其倬留芳搜餘黨悉平之十二年擢
湖廣提督十三年貴州九股苗爲亂授雲南提督哈元生揚威將軍芳副將軍
率師討之尋命尙書張照總理撫定苗疆亂未定高宗即位授張廣泗爲經略
視師廣泗効芳駐軍八弓依附張照與元生互訐師集數月勦撫初無端緒奪
芳官逮京師乾隆元年王大臣會鞫擬發邊遠充軍上命寬之以副將發雲南
遭父憂服除署劍川協副將擢總兵懋楚姚昭通二鎮遭母憂十三年召赴京
師賜孔雀翎命從征大金川即授四川重慶總兵經略訥親檄芳助總兵莽阿

納等攻克普瞻左梁及阿利山梁礮卡又從提督岳鍾琪攻木耳金岡奪土卡三水卡一十四年大金川事定芳赴鎮疏陳考察營汛修補器械並以地當黔楚要衝密訪喇嚕邪教復發存庫米折借濟貧兵上命諸事盡心料理尋調建昌鎮敍平大金川功加左都督十五年西藏朱爾墨特那木扎爾謀叛既誅其黨羅布藏札什等爲亂總督策楞提督岳鍾琪師入藏命芳督兵策應十九年調松潘鎮撫貴州提督二十二年卒

查弼納完顏氏滿洲正黃旗人祖愛音布事世祖爲戶部理事官考滿授拖沙喇哈番以其孫觀音保襲恩詔進三等阿達哈哈番查弼納觀音保弟也襲世職管佐領康熙四十七年授吏部郎中三遷兵部侍郎六十一年授江南江西總督雍正元年臺灣朱一貴餘黨溫上貴糾江西棚民掠萬載新昌亂定大學士白潢尙書張廷玉並疏議安輯棚民下查弼納詳議查弼納奏江西界連福建湖廣東諸省地曠山深民無力開墾招流民藝麻種靛以其棚居名曰棚民安業日久驅令回籍必且生事當編保甲千戶以上駐將吏稽察編冊後結

到流移不得容隱其讀書向學及有膂力者得入籍應試下部議行二年奉言
私鹽賣所在州縣嚴捕停駐防兵巡緝又奏言太湖跨數郡爲盜藪請移參將
駐洞庭東山周村鐵橋鮎魚口馬跡山龜山東山鳳山吳溜設汛駐兵又奏言
江南賦重事繁請改六安太倉潁泗廬邳海通諸州爲直隸州蘇松常三府增
設元和震澤昭文新陽寶山鎮洋奉賢金山福泉南匯陽湖金匱荊溪諸縣上
既譴廢親王允禩以貝勒蘇努尙書隆科多等結黨亂政詢查弼納詔入至查
弼納不以實奏四年召詣京師上親詰之猶堅執不肯言命奪官下王大臣會
鞫乃具言蘇努與阿靈阿揆敘鄂倫岱阿爾松阿結黨欲戴允禩致大位及隆
科多交結揆敘阿靈阿狀王大臣擬查弼納罪斬上諭曰查弼納本後進畏附
權勢朕昨言及聖祖查弼納痛哭不止尙有良心可免其罪尋授內務府總管
鑲紅旗漢軍都統擢吏部尙書協理兵部五年以濫保郎中舒仲降級旋授兵
部尙書七年師征準噶爾靖邊大將軍傅爾丹出北路甯遠大將軍岳鍾琪出
西路查弼納赴肅州督西路軍需八年召入覲授副將軍佐傅爾丹出北路九

年六月噶爾丹策零大舉入犯傅爾丹中敵間欲及敵未集先發查弼納亦頗信之師進查弼納偕傅爾丹督兵繼之至庫列圖嶺入谷遇敵伏師敗績移軍和通呼爾哈諾爾師大潰查弼納與傅爾丹及副將軍巴賽收餘兵四千設營護輜重且戰且行渡哈爾噶納河敵追至查弼納躍馬舞刀潰圍出與傅爾丹相失慮以陷帥得罪曰吾罪當死蒙恩倖得生頒白之年豈可復對獄吏遂復入陳死巴賽亦求傅爾丹不得趨敵力戰死巴賽鄭親王濟爾哈朗孫也敵旌其黃帶以示師參贊馬爾薩至紅石巖遇敵中鎗死達福瓜爾佳氏滿洲鑲黃旗人鼐拜孫也康熙五十二年聖祖追錄鼐拜戰功賜一等阿思哈尼哈番達福襲職管佐領累擢正藍旗滿洲副都統雍正五年世宗以鼐拜功多復一等公仍以達福襲授散秩大臣前鋒統領七年師將出上召廷臣議達福力諫上問故達福曰噶爾丹策零狡黠能得諸酋心爲捍禦主少則諫易將強則制專我數千里轉餉攻彼効死之士臣未見其可辭益堅上曰今使汝副傅爾丹以行汝尙敢辭達福乃叩首出師至邊傅爾丹令達福將二千人駐庫卜克爾九

年傅爾丹出師使達福偕定壽領第一隊及移軍和通呼爾哈諾爾晝夜力戰殺敵千餘敵益大集軍方移達福殿敵三萬餘環攻之力戰復殺敵千餘沒於陳定壽赫舍里氏滿洲正黃旗人初襲三等阿達哈哈番世職授三等侍衛累遷正黃旗蒙古副都統五十六年以傅爾丹爲振武將軍出阿爾泰討策妄阿喇布坦定壽將盛京吉林兵千人當前鋒屢破賊博囉布爾哈蘇烏魯木齊雍正二年授鎮黃旗蒙古都統策妄阿喇布坦使乞和定壽率兵還駐巴爾庫爾部議阿爾泰當駐軍授定壽阿爾泰駐防將軍尋改命穆克登而令定壽以都統銜參贊軍務四年率兵往扎布罕召偕穆克登還京師定壽奏留察罕蒐勒軍中自効七年大將軍傅爾丹自北路出師命定壽仍以都統銜爲軍營前鋒統領八年傅爾丹令定壽以二千人駐伊克斯諾爾護阿濟必濟卡倫九年傅爾丹將出師集諸將議定壽曰噶爾丹策零聞我師至斂兵觀變是有謀也不可信俘言輕進傅爾丹責其懦侍郎永國副都統覺羅海蘭皆持不可弗聽師遂行以定壽領第一隊至雅克賽河獲準噶爾兵二千餘及至庫列圖嶺攻不

克將移軍和通呼爾哈諾爾呼爾哈諾爾華言大澤也定壽詰傅爾丹曰違衆陷師誰執其咎傅爾丹默不語定壽曰言在先敢辭死乎軍甫移敵大至定壽督兵奮擊所向披靡乘勝入敵陳風驟起雨雹並至師大敗敵圍定壽數重定壽中鳥鎗猶力戰相持竟夜敵欲生致之拔刀自刎死於陳副都統西彌賴令索倫兵赴援兵潰亦自殺素圖富察氏滿洲正黃旗人費雅斯哈孫素丹子也素圖初名福列襲二等阿達哈哈番改名授護軍參領康熙五十四年策妄阿喇布坦侵哈密素圖與都統新泰率烏拉兵屯阿爾泰五十九年從征西將軍祁里德山布勒罕深入斬敵伏四百餘次鏖爾河其宰桑色布騰據山拒素圖督兵奮擊大破之色布騰以二千人降六十年移軍巴爾庫爾赴吐魯番督築城屯田雍正元年從副將軍阿喇納駐布隆吉爾二年準噶爾犯邊偕總兵孫繼宗擊之敵敗走乃城布隆吉爾復從副都統達爾達羅卜藏丹津至花海子獲台吉丹津及其妻子並招降台吉噶斯等上以方冬冰凍草枯師奮勇遠征下詔褒勉擢寧夏左翼副都統時素丹爲寧夏將軍年已老上命素圖協理將

軍尋命率西安滿洲兵二千從傅爾丹出北路授參贊大臣及庫列圖嶺之戰素圖與副都統岱豪殺敵四百餘移軍和通呼爾哈諾爾素圖與定壽及副都統常祿等據山梁之東敵大至素圖常祿與歸化城副都統馬爾齊力禦之沒於陳侍郎永國副都統覺羅海蘭岱豪帳中自經死時諸將惟副都統德祿承保從傅爾丹得出伯都訥副都統塔爾岱中鎗穿脛蒙古醫蒙以羊皮三日始蘇上令還伯都訥塔爾岱言願從軍勦賊雪恥若負罪而還何顏見七十有七之老母上深嘉之並賜塔爾岱及其母各白金千參贊都統陳泰屯科布多河岸聞敵至退駐扎布韓上命斬之議卹查弼納馬爾薩素圖覺羅海蘭皆授拜他喇布勒哈番兼拖沙喇哈番達福岱豪西彌賴常祿定壽永國授拜他喇布勒哈番餘並授拖沙喇哈番查弼納達福定壽素圖舊有世職查弼納合爲三等阿達哈哈番定壽素圖皆合爲三等阿思哈尼哈番達福以其孫別襲巴賽追封簡親王見鄭親王濟爾哈朗傳

論曰西藏之師噶爾弼深入奮戰而功獨歸主將番代遠戍快快不欲行殆以

此敗查克丹與額爾德尼昭之戰常賚佐巴爾庫爾之師元生芳屢定亂苗而元生尤著卒以牽制坐使遼延查弼納別歷已久晚乃從軍和通腦兒之敗一軍盡覆而主將獨逍重誅抑又何也